

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-04382-2014
Broj akta: 05EN-001
Gračanica, 31.12.2014.godine

Z A P I S N I K
SA 25. SJEDNICE OPĆINSKOG VIJEĆA
GRAČANICA

Održane dana 26. 11. 2014. godine u sali za sjednice nove zgrade Općine Gračanica sa početkom u 13,00 sati.

Od 28 članova Vijeća početku sjednice je prisustvovalo 26 članova. Odsutne su Pašić Esma i Jasenka Ahmetašević.

Sjednicom je predsjedavao Edin Ibrišević predsjedavajući Općinskog vijeća Gračanica, zajedno sa zamjenikom Seadom Gazibegovićem i sekretarom Zehrom Mujačić.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Vijeća sjednici su prisustvovali i Općinski načelnik Nusret Helić, Azra Mustajbašić savjetnik za odnose sa javnošću, Jasminka Imširović Općinski pravobranilac, šefovi službi za upravu Aida Hodžić, Mustafa Bajić i Zijad Dedić, izvjestioci po pojedinim tačkama dnevnog reda Refija Terzić, Vanesa Mahmutović, Sajima Zaketović, poslanik u Skupštini TK Mirza Omerdić, predstavnici Plenuma Gračanica, te predstavnici sredstava informisanja.

Zapisnik sa 24. sjednice Općinskog vijeća Gračanica usvojen je jednoglasno.

Prije nego se prešlo na rad, predsjedavajući Vijeća je upoznao prisutne sa sugestijom Etičke komisije da se vijećnici pridržavaju Etičkog kodeksa, da se utiša zvono na mobilnim telefonima i ukoliko ima neko potrebu da se javi, da to uradi izlaskom iz sale za sjednice.

Pitanja i inicijative su kandidovali:

Tursunović Esad je reagovao ne izlazeći za govornicu jer smatra da je dosta toga da se Fadil Mešić uvijek prvi javi za diskusiju.

Fadil Mešić:

„Prije nego što pređem na vijećničko pitanje iskoristit ću priliku da se zahvalim Službi za lokalni razvoj, poduzetništvo i njihovom šefu Zijadu Dediću, što su realizovali moju vijećničku inicijativu. A riječ je o parking prostoru za taksi stajališta ispred bolnice. Prelazim na vijećnička pitanja koja upućujem Općinskom načelniku:

1. Na potezu od Bosnine prodavnice do čitaonice su šahovski svi začepljeni. Sve površinske vode koje dolaze iz njiva s lijeve strane prelaze asfalt i pune dvorišta ljudi tj.

plave. Uzrok je začepljeni šahtovi. Načelnice ovdje treba brzo reagovati prije nego li padne nova kiša. Ovdje trebaju povjerenici mjesnih zajednica da rade.

2. Gospodine načelnice kod izvođenja radova na obilježavanju pješačkih prelaza primjetno je da su isti urađeni nekvalitetno. Dolazi do brzog ispiranja obilježenih površina, može li nadzorni organ uvidjeti kvalitet boja-laka, može li izvođač radova dati neku garanciju na kvalitet?

3. Zašto još nadležna komisija nije izašla na procjenu štete od poplava u avgustu mjesecu našem sugrađaninu Šabanu Omerović? I nakon što je 3 puta upozoravao, da komisija nije izašla. Radi se o lokalitetu Bazen, tačnije kod Aganove praone. Lično sam se uvjerio kolika je šteta.

Esad Tursunović:

„Zamolio bih predsjedavajućeg da više ne forsira jedne te iste ljude da se prvi javljaju. Dobro sam gledao i pratio i digao sam ruku da se javim Edine.

Prva stvar. Dobio sam ukor-kritiku od Etičke komisije od gospođice Sabine. Ovom prilikom bi se javno izvinuo kolegici Mirsadi, ako se našla uvrijeđena. Ja sam htio da je pohvalim, zato što je stvarno lijepo izgledala. Pohvalio bih i Sabinu, ali nisam imao argumenata za to. Šta ću ja.

Druga stvar, evo dobio sam upravo poruku od „Obrt komerca“ gdje stoji, 28. 11. 2013. godine predali smo zahtjev za tri objekta, 10. 4. 2014. godine predali smo za dva objekta. Do danas kad god smo zvali, rekli su nam da nema formirane komisije. Pozdrav Nifka. Znači, opet jedne te iste stvari vezano za privredu se dešavaju. Ovom prilikom bi komisiji, odnosno urbanizmu da sugerišem da povedu računa“.

Rukija Begović:

„Imam jednu inicijativu od Merhameta, prema načelniku Općine Gračanica. Predmet je zahtjev za dodjelu zemljišta i zgrade kotlovnice na lokaciji Luke u trajno vlasništvo.

Obraćamo Vam se sa zahtjevom za dodjelu zemljišta i zgrade kotlovnica Luke u trajno vlasništvo za potrebe HO „Merhamet“ MDD F BiH-Regionalni odbor Tuzla, Osnovnom odboru „Merhamet“ Gračanica, sa sjedištem u ulici Mehmeda Vehbi ef. Šemsekadića bb, Gračanica.

Prema podacima iz izvoda posjedovnog lista navedeni objekat sa dvorištem se vodi kao društvena svojina, a nositelj prava je Općina Gračanica, katastarski broj 11887, parcela pod brojem 5389/1 plan 36, na lokalitetu Luke Gračanica.

Obzirom da Osnovni odbor „Merhamet“ Gračanica, ne posjeduje u vlasništvu svoj poslovno-skladišni prostor, ovim potezom bi riješili trajno problem, kako za rad i djelovanje JNK tako i za ostale sadržaje i poslove sa kojima se susrećemo.

Nadamo se da ćete uzeti ovaj zahtjev u razmatranje i u nadi povoljnog rješenja smo Vam unaprijed zahvalni“.

Senad Selimović:

„Imam jednu inicijativu, ide prema Općinskom načelniku.

1. Ovo je treći puta kako javno tražim da se hitno izvrši sanacija putnog pravca preko Monja. U septembru, zatim u oktobru, pa evo i danas, u novembru, tražim ponovo, po treći puta, da se pod hitno krene u sanaciju puta preko Monja. Putni pravac je u veoma lošem stanju i zahtijeva što hitniju sanaciju. Niko ništa ne radi i niko ništa ne poduzima da se bar malo put sanira, kako bi nesmetano se odvijao saobraćaj za putnička i teretna vozila. Putni pravac se može sanirati i za sada ne treba mnogo sredstava. Mi smo naučili godinama hodati po makadamu i nije nama to neobično. Na prostorima Džakula, Buka, Trnovaca i Prijekog Brda živi skoro 5.000 ljudi. Svakodnevno se saobraćaju autobusi sa radnicima, đacima i

putnicima, putnička i teretna vozila i veoma je važan prijevoz. Niko ništa ne radi i niko ništa ne poduzima da se put bar malo sanira, a zima je na pragu. Snijeg može svakog sata pasti. Šta i kako dalje? Tko će snositi odgovornost i posljedice za bilo kakve nesreće ili nezgode koje se mogu desiti ili će se desiti na tom putnom pravcu? Tražim podršku i Općinskog vijeća, da se što hitnije, a najkasnije do kraja vikenda, izvrši neophodna sanacija putnog pravca preko Monja. Ukoliko to nije moguće, čim padne prvi snijeg, put neće moći biti prohodan. Mnogi su samo čuli kakvo je stanje na cesti preko Monja, neki su išli tom cestom, a sada ću vam svima i pokazati fotografije sa tog putnog pravca. Snimio sam i pitam šta i kako dalje? Dajte rješenja i pomozite nam svima. Hvala“

Hadžić Ezaneta:

„Evo ja ne znam po koji put mi iz Stjepan Polja izlazimo sa ovim zahtjevom. Neka mi predsjedavajući pomogne, a mislim da je to četiri puta, pa ako griješim neka me ispravi, jer mi po istom pitanju izlazimo. Mi smo, znači, upućivali zahtjeve i prije prema JP „Autoceste“ Federacije BiH, a odnosi se na sljedeće:

„Poštovani, ponovo Vam se obraćam sa zahtjevom za rješavanje vertikalne i horizontalne signalizacije u mjestu Stjepan Polje, općina Gračanica na magistralnom putu M-4 na raskrsnici magistralnog i lokalnog puta.

S obzirom na činjenicu da svakodnevno cestu prelazi veliki broj učenika do lokalne škole, pozivam Vas da ozbiljno shvatite situaciju i da rješavanjem ove signalizacije osigurate bezbjednost učenika“. Pitala bih dali to Vas ne interesuju dječiji životi i šta je u pitanju?“

Pjanić Safet:

„Ja ću kandidovati dvije inicijative:

Prva inicijativa se odnosi na cijenu ulaza na gradsku deponiju. Naime, mi smo prije mjesec dana imali tri kamiona šljake i platili smo 150,00 KM samo ulaz, bez prevoza. Mislim da je to zaista enormno visoko tako da stimuliramo divlje deponije. Stoga dajem inicijativu da se ova cijena smanji za 50 %, jer ćemo time smanjiti broj divljih deponija, a danas ih imamo već puno.

Druga inicijativa je, a uputio sam je i prije možda godinu dana. Radi se o tome da se kod bolnice postavi ogledalo, a u ulici Patriotske lige i Viteške ulice. Evo u zadnjih par dana smo imali dva teška slučaja saobraćajne nesreće. Zaista je iz Viteške ulice teško izaći na ulicu Patriotske lige i mislim da bi ogledalo riješilo mnoge te probleme. Iako sam već upućivao ove inicijative, evo ponovo ja kandidujem i molim da se što prije postavi to špiglo“.

Almedin Devedžić:

„Evo ja bih uputio jednu hitnu inicijativu načelniku Općine, a vezano za izgradnju pristupnog puta. Upućujem inicijativu za hitno rješavanje kuća porodicama koje su u elementarnim nepogodama ostale bez svojih domova na lokalitetu Mjesne zajednice Lukavica – Osnovna škola. Obrazloženje: Obzirom da je izvršena dodjela placeva za gore navedenu populaciju, istoj je potrebno hitno riješiti pristupni put jer postojeći u okviru školskog prostora ne može poslužiti svrsi gradnje koja se očekuje u narednom periodu. To se može riješiti u roku od 24 sata, jer se radi o maloj kvadraturi zemljišta koju treba otkupiti i razmjeriti put kako bi se vozio materijal“.

Odgovor na pitanje Tursunović Esada vezano za zahtjev „Obrt komerc“ dala je Aida Hodžić, šef Službe za urbanizam:

„Da odgovorim na pitanje Esada Tursunovića vezano za predmete „Obrt komerca“, a radi se o tehničkim prijemima objekata. Da Vam kažem i prošli puta ste postavili tako pitanje, a bez da se podnosilac zahtjeva uopšte konsultovao sa Službom ili bilo šta da je prije toga

tražio, pa je ovdje bilo i netačno iznesenih podataka, ali sada to nije ni važno iz razloga da sa ove govornice nebi otišle pogrešne informacije želim da kažem. Tehnički prijem objekata i za kog se izdaje upotrebna dozvola posljednji je dokument koji se izdaje za neki objekat. I time se potvrđuje tehnička ispravnost zgrade i ispunjavanje svih tehničkih normativa u gradnju uključujući i one posebne koji postoje za posebne objekte. Tehnički prijem objekta vrši komisija koja se sastoji od tri do pet, nekad čak i više članova koji su svi diplomirani inženjeri određenih struka i sa najmanje pet godina radnog iskustva. Samo da se zna kolika je ozbiljnost. Općina Gračanica je do prošle godine imala radnika zaposlenika koji zbog svog zdravstvenog stanja se bavio samo tehničkim prijemima objekata i taj posao uspješno koordinirao i uspostavljao. Poslije toga smo mi bili prinuđeni da, za sve te komisije, pa čak i za predsjednike, napravimo javni poziv i da ponovo izaberemo članove komisije za tehnički prijem. Taj postupak je malo potrajao jer su nas i elementarne nepogode spriječile da završimo te dokumente. Ali smo svima onima kojima je trebalo za kredit, za razvojnu banku, za nešto slično, pokušali izaći u susret. Tako da smo sa svim podnosiocima zahtjeva bili u dogovoru i zajednički smo saradivali da nebi bilo takvih problema za privrednike. „Obrt komerc“ zastupa pravno agencija i sa gospođom koja je vlasnica te agencije smo bili stalno u kontaktu i bilo je, ne žuri nam se, uredu je i možemo pričekati. I da vam kažem da je komisija imenovana. I nema pet zahtjeva, imaju samo dva i to se radi o objektima koji su bili predhodno kao bespravna gradnja, pa smo ih prvo legalizovali. I prošle godine smo im izdali odobrenje za građenje, pa sad idu na upotrebnu dozvolu. Toliko“.

Esad Tursunović je aplicirao:

„Vjerovatno uvažena koleginice vi ste u pravu sa te stručne strane, ali mogu vam dati na uvid mobitel i poruku, ja ovdje ne izmišljam ništa, niti lažem. Vi ste to kao tako i rekli, samo što ste lijepo upakovali. Ja kao izmišljam i slično, ja se samo ovdje borim za privredu. Nizašto drugo. Umjesto što lobiramo ovdje i tražimo mjesta za zapošljavanje, molim vas recite mi kako se organizovala inspekcija. Došli su kao apači u Gračanicu na Tuzlanski kanton. Niko nije našao za shodno iz privrede, iz Opštine da pošalje protestnu notu njima. Od petog do osmog mjeseca imali smo strašne probleme u privredi. Strašne, klizišta, poplave i masu problema, Gračanica i kompletan Tuzlanski kanton. Došli su kao apači u Gračanicu. Trideset i nešto ih je došlo. Zašto niko nije stao odavde, Udruženje privrednika, privreda Gračanice i da kažu, stanite, dokle ćete više samo udri po privredniku to me je toliko razočaralo. Razočaralo me ovdje iz Etičke komisije što reaguje što sam ja pohvalio. Jeli to prema Esadu Tursunoviću ili prema partiji ima nešto. Ona prema meni treba imati respekt. Dvadeset i tri godine ja sam u privredi, od trideset osam. Sa petnaest godina krenuo sam u privredu. Dvadeset i tri godine staža ja imam u privredi. Toliko“.

Za diskusiju se javio i Općinski načelnik Nusret Helić:

„Evo prvo da kažem da su dobre inicijative i da uglavnom uvažavamo, jer nećemo posebno pismeno odgovarati. Posebno ću vezano za Monj. Ja ponavljam. Mi u Monj pomalo ulažemo, a Monj je projekat koji je težak 150.000 KM i ponovo su iz Svjetske banke zvali, provode procedure. Mi ne možemo ništa uraditi sem ovog, pomalo održavati, jer propast će nam tih 150.000 KM. To je projekat i u tom smislu ćemo i ovih dana održavati prohodnost, dok oni po svojim procedurama, jer oni raspisuju tender, oni biraju izvođače i zbog toga je zastao i on, zbog toga su zastali i Avdići, zbog toga je zastala Lukavica, put prema Prnjavoru. Dakle, mi ćemo zaista uložiti što možemo, a sve ono što uložimo nema šansi da u roku ovaj projekat se gore izmiri.

Zbog toga je specifičan Monj i ja bih zamolio, budite strpljivi i mi pritišćemo svaki dan iz Svjetske banke koji su odobrili sredstva i nadamo se da će ovih dana raspisati se tender. Ovo

ostalo, ja prihvatam inicijative i zaista nam valja od Lukavice pa ovo što je Pjanić rekao, to su sitne stvari i ja ću zadužiti službe da to urade“.

Prešlo se na raspravu o predloženom dnevnom redu.

Nije bilo učesnika u diskusiji, pa je predsjedavajući Vijeća pročitao dnevni red koji glasi:

1. ODLUKA O IZMJENAMA I DOPUNAMA BUDŽETA OPĆINE GRAČANICA ZA 2014.GOD.
2. ODLUKA O OBAVLJANJU VOLONTERSKOG RADA NEZAPOSLENIH OSOBA VISOKE STRUČNE SPREME SA PODRUČJA OPĆINE GRAČANICA U ORGANU UPRAVE I PRAVNIM SUBJEKTIMA IZ JAVNOG I PRIVATNOG SEKTORA.
3. ODLUKA O PROGLAŠENJU KOOPTIRAJUĆEG ČLANA KOMISIJE ZA KONCESIJE OPĆINE GRAČANICA.
4. INFORMACIJA O ZAPOSLENIM I NEZAPOSLENIM LICIMA NA OPĆINI GRAČANICA.
5. INFORMACIJA O REALIZACIJI PROJEKTA REGIONALNE DEPONIJE DOBOJ.
6. RJEŠENJA IMOVINSKO PRAVNE SLUŽBE.

TAČKA 1

ODLUKA O IZMJENAMA I DOPUNAMA BUDŽETA OPĆINE GRAČANICA ZA 2014.GODINU

Obrazloženje je dao Općinski načelnik Nusret Helić:

„Vi ste uz poziv za sjednicu dobili i prijedlog Odluke o izmjenama i dopunama budžeta Općine za 2014. godinu, sa detaljnim obrazloženjem.

I pored toga ima potrebe da i ja na neke stvari podsjetim i kažem čime smo se rukovodili i šta su razlozi za rebalans budžeta.

Ako se sjećate, mi smo prije par mjeseci nagovještavali da će morati doći do rebalansa budžeta, posebno nakon prirodne nesreće koja nas je zadesila u maju i avgustu mjesecu i potreba za otklanjanje posledica te nesreće. I evo danas je rebalans pred nama.

Kao što ste mogli vidjeti predloženi budžet po rebalansu je veći za 939.420 KM i iznosi 13.164.247 KM, a čine ga:

- višak prihoda iz prethodnih godina 791.827 KM,
- prihodi 11.097.420 KM, od čega su:
 - porezni prihodi 6.340.000 KM,
 - neporezni prihodi 2.004.420 KM,
 - tekući grantovi 2.753.000 KM,
 - primitci 1.275.000 KM.

Osnovni razlog za veći budžet su povećane tekuće potpore, te neki porezni i neporezni prihodi. Potpore su veće za 1.200.000 KM, a donacije za 170.000 KM i odnose se uglavnom na namjenska sredstva za otklanjanje posledica prirodne nesreće.

Porezni i neporezni prihodi su veći za cca 220.000 KM.

Smanjene su kapitalne potpore od Kantona i Federacije za 340.000 KM.

Kako su potpore namjenska sredstva za projekte koji nisu bili planirani u budžetu (porušene kuće, stradali krovovi, hitne intervencije i dr.), valjalo ih je uvrstiti u budžet kroz rebalans. To je jedan od razloga rebalansa.

Drugi razlog je hitna potreba saniranja puteva, klizišta, čišćenja vodovoda, te povećanje tih troškova u odnosu na planirane u budžetu. I ova realizacija nije mogla čekati rebalans, te je moralo doći do preraspodjele i umanjenja nekih stavki da bi se pokrili troškovi za otklanjanje posljedica prirodne nesreće. Radi se o našim vlastitim sredstvima jer su donacije nedovoljne.

Takođe je došlo do nekih povećanja na kapitalnim projektima, nakon što su provedene procedure javnih nabavki i sklopljeni ugovori (vodovodi Vranovići, Trnovci, Donja Lohinja, Doborovci, putevi, Babići-Vis, Donja-Gornja Lohinja, Soko Oštrikovac, Gornji Doborovci), a u međuvremenu su i građani platili svoja sredstva.

Povećana je i budžetska rezerva zbog neplaniranih izdataka, kao i neki drugi izdaci kao što su: stambeno zbrinjavanje Roma (naše učešće u obnovi 12 kuća), izdaci PTT usluga, tekuće održavanje, tenderi, izdaci za mrtvozornike, zaštitari, sport i dr.).

Za projekte koji su ostali i po rebalansu su završene ili pokrenute procedure i očekivati je da će biti okončane do kraja godine ili u većem dijelu.

Da bi se na kraju mogao uravnotežiti budžet, bilo je potrebno smanjiti odgovarajuće stavke, pa i na nekim projektima. Sve ono što objektivno nije moguće završiti do kraja godine, treba prenijeti u naredni budžet i bit će tretirano kroz prijedlog budžeta za decembar mjesec. Neki od tih projekata su već planirani i u Nacrtu budžeta.

Valja priznati da je ova godina bila specifična i da je zaista bilo teško predvidjeti sve što se dešavalo i šta će se dešavati do kraja godine. Posebno mislim na posljedice prirodne nesreće, jer su zahtjevi i potrebe velike.

Zbog toga je rebalans bilo teško pripremiti. Iskreno se nadam i želim da uspijemo završiti i ovu godinu bez deficita. Bio bi to naš veliki zajednički uspjeh.

Predlažem vijećnicima da usvoje rebalans budžeta i stvorimo uslove da godinu završimo uspješno. Hvala“.

Komisija za propise i statut razmatrala je Odluku i nije imala primjedbi.

Učesnici u diskusiji su:

Krajinović Nihad:

„Ja ću samo kratko, prije nego što nešto kažem vezano za ovu Odluku. Svima vama sa zakašnjenjem i građanima čestitati Dan državnosti Bosne i Hercegovine. Obzirom na situaciju u kojoj se općinski budžet našao u ovoj godini i obrazloženja izvjestioca, Klub SDP-a Gračanica će podržati Odluku o izmjenama i dopunama budžeta Općine Gračanica za 2014. godinu“.

Rahim Gadžić:

„Klub vijećnika SDA je razmatrao izmjene i dopune budžeta za 2014. godinu tzv. rebalans budžeta. Evo načelnik je na kraju svog obrazloženja rekao da će ovi projekti koji se danas brišu iz budžeta i jednim dijelom se umanjuju, bit će prioritet u novom budžetu, a mi to i tražimo to jest da se uvrste u budžet za 2015. godinu i mi ćemo podržati rebalans budžeta“.

Za diskusiju se javio Mirza Omerdić, poslanik u Skupštini Tuzlanskog kantona i iznio sljedeće:

„Ja sam došao sa jednim razlogom. Zamoljen sam od strane Mjesne zajednice Stjepan Polje i da iznesem jedan problem o kojem je načelnik većim dijelom upoznat. Radi se o izgradnji puta Luke u Stjepan Polju. Naime, 2013.godine budžetom je bilo utvrđeno da će jedan dio sredstava biti planiran za izgradnju toga puta, međutim dok su procedure bile završene to se izvršilo u 2014.godini. U 2014.godini planirana su još sredstva za dovršenje tog puta. A u ovom rebalansu budžeta imamo planirano izvršenje kao razlika od 4.000 KM. To malo zbunjuje ljude jer definitivno, dakle u 2014.godini je izvršeno ono što je planirano u 2013.godini. S obzirom da je to već poodmakla faza, mislim već se uradilo dosta toga i bila bi šteta takvu stvar ostaviti na cjedilu, jer vremenski uslovi, kiša može definitivno napraviti da ono što je urađeno ima nekakvu štetu. Mi smo dakle stanovišta da bi trebalo u ovom rebalansu budžeta ostaviti taj iznos koji je trebalo da bude u 2014.godini. Dakle, ono iz 2013.godine i ono od 2014.godine da izuzmemo od izvršenja i da bude planirano ono što nije izvršeno rebalansom. A da se izvrši kad za to bude sredstava, dakle 2015.godine. Ja bih zamolio dakle, da izađemo u susret Mjesnoj zajednici Stjepan Polje, jer smo svi mi zabrinuti za sudbinu tog puta, uvažavajući činjenicu da su bile poplave. Zato bih ja molio da se iznađe rješenje da ostane u rebalansu budžeta ta neto vrijednost, a da se izvrši kad se za to steknu uslovi“.

Općinski načelnik je odgovorio:

„To je za nas nova stavka. Dakle, izvršenje onog što je planirano u 2013.godini nije se završilo i situacija je došla u 2014.godini. Ona sredstva sa kojim smo raspolagali u budžetu 2014.godine su praktično potrošena. Mi iz ovog možemo izaći samo da procedure za nastavak tog puta provedemo, a da kao i ove sve druge planiramo kroz budžet slijedeće godine, jer objektivno nije moguće sprovesti procedure i završiti. Evo ja ću ovo smatrati kao primjedbe na nacrt budžeta i da ovaj projekat pošto je krenuo projekat tog puta, i da ga uvrstimo za narednu godinu, a da se već sad pokrenu procedure. Dešava nam se stalno, ali uzalud takve su zakonske procedure da dok to provedemo, a ne možemo odjednom na početku godine raspisati jer ne znamo kako će se odvijati budžet. I onda nam se desi da neki projekti ne stignu da se završe. Valja nam pokušati se uklapati. Najbolje je evo ovi sad projekti za koje smo sproveli procedure i ako se ne završe, oni se odmah u martu počinju raditi. A mi čekamo priliv sredstava i onda kad imamo sredstva onda raspisujemo procedure. Valja nam tu napraviti nekakav balans, a ovo možemo riješiti samo tako da smatramo kao primjedbe na nacrt i uvrstimo za 2015.godinu“.

Ponovo se javio Mirza Omerdić:

„Zahvaljujem načelniku, i to može biti jedno od rješenja, s tim što bih ja zamolio. Znaete da smo mi na nacrt budžeta za 2015.godinu uvrstili iz Mjesne zajednice Stjepan Polje još jedan projekat, pa da ne dođe u koliziju. To što ćemo mi dozavršiti put koji smo trebali 2013.godine i 2014. godine, ne dođe u koliziju znači sa ovim projektom. Da jedno drugo ne potare, nego da i to se planira, a pokušat ćemo i sa većih nivoa to rješavati“.

Odluka o izmjenama i dopunama budžeta Općine Gračanica za 2014. godinu jednoglasno je usvojena.

TAČKA 2

ODLUKA O OBAVLJANJU VOLONTERSKOG RADA NEZAPOSLENIH OSOBA VISOKE STRUČNE SPREME SA PODRUČJA OPĆINE GRAČANICA U ORGANU UPRAVE I PRAVNIM SUBJEKTIMA IZ JAVNOG I PRIVATNOG SEKTORA.

Obrazloženje je dao Općinski načelnik Nusret Helić:

„Uobičajeno je da ovo Vijeće donosi ovakve odluke i dobro je zbog mladosti koja završava fakultete da bar jednom broju obezbijedimo volontiranje. Mi smo u pripremi ove Odluke zatražili od osnovnih škola, srednjih škola i nekih organizacija za koje kadrove mogu obezbijediti, prije svega mentore i prostor i evo vdijeli ste da je to ovih 28 zanimanja. Da vam kažem da jedan volonter, onaj koji je van općine i volontira u srednjim školama ili u nekom privrednom subjektu, Općinu košta 236,00 KM mjesečno. Topli obrok je 80,00 KM i Zavodu za zapošljavanje Tuzlanskog kantona 126,00 KM i za PIO 30,00 KM. Dakle, ovih 28 nas košta oko 80.000,00 KM koliko smo i planirali u budžetu. Svaki veći broj nas košta za ovoliko koliko sam rekao. Ja predlažem, da usvojimo za ovih 28, a čuo sam da će biti primjedbi za još neka zanimanja. Moguće je da idemo do 30, spram sredstava koja smo planirali, mogli i sprovesti ovu Odluku“.

Učesnici u diskusiji su:

Hasan Fehratović u ime Komisije za propise i Statut predložio je slijedeće:

„Komisija je dakle ovo razmatrala i naravno ako bude mogućnosti proširenja, ne samo na cifru o kojoj ste govorili nego zavisno i od broja volontera koji će se prijaviti. Nije ovo primjedba nego konkretno je da se naspram mogućnosti proširi broj za još jednog volontera i to zanimanje Visoka poslovna škola, što je predložio jedan član komisije i to prenosim. Opet ovo kako sam čin zavisi od toga da li se prijavio neko od poslodavaca da može prihvatiti tog volontera“.

Edin Ibrišević:

„Ja bih konkretno imao jedan prijedlog i zatražio od Općinskog načelnika da proširi ovu odluku za dva diplomirana inženjera građevinske struke. Obrazloženje je, mi smo tradicionalno kraj koji se bavi građevinarstvom što je poznato. Imamo dosta uspješnih građevinskih firmi, a imamo i takvih lica na birou, pa bi dobro bilo da se ovaj spisak proširi. Takođe, imam prijedlog za izmjenu. Ovdje se navodi, da ne remetim ovaj finansijski dio, za dva volontera razredne nastave. Kolege koji rade u prosvjeti, složit će se da ima puno takvih lica a neke su potrebe, da se ovdje kaže, jedan profesor razredne nastave, volonter, a da se doda jedno lice logoped surdiardiolog i evo ovdje imamo direktora škole koji ima takvu potrebu“.

Tursunović Esad:

„Ja bih samo da repliciram kolegi Edinu. Vjerovatno ovdje ima lobiranja za ova dva čovjeka i veoma je dobro taj prijedlog. Ako već imamo na Birou tih građevinskih inženjera, da se slučajnim uzorkom izvuku. Ako je 32, mi ćemo odavde reći 18, 25 i oni da idu. A ne da idu imenom i prezimenom. Dosta je više lobiranja. Nek idu ljudi koji zaslužuju“.

Predsjedavajući Vijeća je dodao:

„Postoji komisija koja to radi“.

Tursunović Esad je nastavio:

„Svi dobro znamo da postoji komisija i postoji ono između redova Edine. Molim vas, na ovaj prijedlog, na ovo uklapanje hoću da budem obaviješten ko ide, imenom i prezimenom i žalit ću se. Hvala“.

Pjanić Safet:

„Ja imam samo prijedlog, da se u ovu Odluku još uvrsti ako može dva zanimanja, a to su svršeni studenti fakulteta javne državne uprave. Mislim da su to zanimanja vrlo atraktivna i da im treba dati šansu“.

Hasan Puškar:

U zadnje vrijeme, znači pojavljuje se, namjenski fakultet javna uprava, pa da se i to uvrsti, kako reče Pjanić. Moja inicijativa je drugačija. Da mi ostavimo načelniku ukoliko se pojavi tih zanimanja, pet, šest, sedam, da mi ostavimo slobodnu procjenu a da on nas izvijesti, pa da ne bude ovdje 26, nego da bude 35 i da imamo taj neki broj i da planiramo u budžetu povećan broj zanimanja volontera. Da znači sad ne izlazimo svi pojedinačno i govorimo ko to kome treba. Da ostavimo broj ruku i da planiramo više sredstava, a da usvojimo ovo što je predloženo. I druga stvar, ne bih ja umanjivao broj profesora razredne nastave na uštrb ničega. Da povećamo u budžetu sredstva jer u budžetu od 12-13 miliona ne znači ništa 20.000,00 KM. Da mi načelniče povećamo i ostavimo vama za 5 ili 6 nekih zanimanja i da to stoji u Odluci ako se pojavi neko deficitarno zanimanje da ga rasporedite“.

Hasan Fehratović:

„Možda da idemo, da nam se ne desi da mi ovdje cementiramo sa određenim brojem volontera, a možda ih neće biti nešto previše iznad ovog broja. Ja bih samo postavio pitanje načelniku, koliko je moguće da se ovo okonča do usvajanja budžeta. Dakle, da se to završi do decembarske sjednice, na kojoj će se usvajati budžet i da mi paralelno sa time proširimo ova sredstva. Da to ne bude 80.000,00 KM i onda bi se tačno znalo. Dakle, sugerisem da se koliko je moguće ubrza ova procedura, da se sve okonča do usvajanja budžeta za narednu godinu i da imamo jasnu sliku. Možda će trebati ovu stavku proširiti za dvadesetak hiljada i da to ne bude sporno. Znači da ova Odluka ide paralelno sa budžetom. To dopunjujem“.

Almedin Devedžić:

„Evo ja ću kratko. Tragom predhodnih diskusija, ja bih dopunio ovu tabelu u članu 2. ako može načelniče da stoji broj profesora razredne nastave, i da se ubaci novo zanimanje diplomirani logoped surdoaudiolog. Ovo govorim jer u našoj službi ima potrebe za tim i možemo ga rasporediti“.

Esad Tursunović:

„Kad smo već oko volonterskog rada ja predlažem da napravimo komisiju Edine, imenom i prezimenom mogu ti reći na koga apliciraš. Dosta više tih stvari. Vama Edine govorim, dosta više i partija i birača, previše je svega. A ovo ima smisla što govorim, jer ovo jedno radno mjesto evo zapamtite, je Hamzić, za koje Edin aplicira. I druga stvar, svi imate dovoljno vremena poslije tri sata da sjedite da se slikate i evo ovom prilikom pitao bih kolegu Fadila Mešića. Dokle je Fadile u tebe radno vrijeme?“

Reagovao je predsjedavajući i opomenuo Tursunović Esada da to pitanje nije u okviru dnevnog reda, odnosno tačke o kojoj se vodi rasprava.

Krajinović Nihad:

„Evo ja slušam kolege koji diskutuju o ovoj Odluci i čini mi se da se može slobodno naslutiti da svako nekog pokušava da ubaci, pa bih zaista zamolio kolege da budu malo ozbiljni. I kao što sam imao već priliku čuti, jer sam se takođe raspitivao za logopeda. I to za mnogoljudniju, da tako kažem, jer je najveći broj učesnika u Osnovnoj školi „Hasan Kikić“. I dobio sam informaciju da ne može volonter raditi tamo gdje nema svog mentora, tako da su

naše želje i da nam je ovdje nastavnika, ovdje volontera, a ako nema mentora da ga neko obučava, nemojte da oduzimamo mjesto nekome ko bi stvarno mogao negdje izvolontirati gdje već ima mentor za njegovo radno mjesto“.

Hasan Puškar:

„Moja inicijativa se nije odnosila da ikoga ubacujemo, nego se moja inicijativa odnosila baš da olakšamo neke stvari. Sutra se recimo pojavi neko zanimanje i moramo praviti izmjenu i dopunu Odluke ili će sutra neko reći što ste vi načelnice primili 28 a bilo ih je 29, a možda je bila potreba. Zato kažem da ne izlazimo svi pojedinačno, pa da olakšamo to Odlukom da se može proširiti ukoliko se ukaže potreba, a isfinansirat se uvijek može iz budžetske rezerve. I da više ne izlazimo pojedinačno i ne raspravljamo više nego o rebalansu“.

Almedin Devedžić:

„Pokušavamo da ubacimo što više naših kadrova da odrade taj staž i nema tu nikakve politike, ja bar tako lično razmišljam. Ali da kažem, ne mora biti u školi stručno lice unutar, može se naći iz druge škole uz saglasnost Pedagoškog zavoda. Konkretno logoped, može se ići u te stvari“.

Gadžić Rahim:

„Nije mi jasno zašto ovoliko diskusija jer mi Vijeće, načelnik i službe, jedino na ovaj način možemo pomoći studentima. Stipendije, ne dajemo im puno i dajte da više ne pričamo, da li je to dvadeset, trideset ili više, nego da bude i više a u budžetu ćemo planirati sredstva. Imamo mi puno studenata koji rade i na drugim mjestima i to rade džabe. Ja bih da bude veća stavka ne osamdeset nego i sto pedeset i ako smo za to spremni da se ide u tom pravcu, jer će se možda skidati sredstva i sa nekih projekata, ali moramo svi biti spremni za ovo što tražimo“.

Općinski načelnik Nusret Helić:

„Ovo je samo omogućavanje djeci da steknu uslove da ravnopravno konkurišu za posao sa drugim, odnosno da mogu polagati stručni ispit koji je opet uslov za konkurisanje. Ja predlažem da iz ovog izađemo, a vi ste predložili nekoliko dopuna. Dakle, visoka poslovna škola, građevinski stručnjaci i dr. Nama je teško otvoriti novo radno mjesto u administraciji ali kroz volonterski rad nama građevinski stručnjak ili arhitekta može pomoći i da neke poslove odradi. Zbog toga se slažem da ih uvrstimo, zatim logopeda, a da ostavite tamo da načelnik može ako obezbijedi volontiranje uvrstiti i drugih desetak, a načelnik će obezbijediti odakle, a o tome ćete biti obaviješteni. Isto tako i volonter sa završenim fakultetom javne uprave. Znači da ostaje Odluka uz dopune koje su izvršene i da se ide do broja četrdeset“.

Prešlo se na izjašnjavanje. Odluka o obavljanju volonterskog rada nezaposlenih osoba visoke stručne spreme sa područja općine Gračanica u organu uprave i pravnim subjektima iz javnog i privatnog sektora je usvojena sa 25 glasova „ZA“ i 1 „PROTIV“.

TAČKA 3

ODLUKA O PROGLAŠENJU KOOPTIRAJUĆEG ČLANA KOMISIJE ZA KONCESIJE OPĆINE GRAČANICA.

Uvodno obrazloženje dala je Aida Hodžić, šef Službe za urbanizam.

Nije bilo učesnika u diskusiji i odluka o proglašenju kooptirajućeg člana komisije za koncesije Općine Gračanica je usvojena jednoglasno.

TAČKA 4

INFORMACIJA O ZAPOSLENIM I NEZAPOSLENIM LICIMA NA OPĆINI GRAČANICA.

Obrazloženje uz ovu tačku dnevnog reda dala je Refija Terzić, rukovodilac Biroa za zapošljavanje:

„Uvaženo predsjedništvo, poštovani vijećnici, načelnice i ostali prisutni, vijećnici su dobili informaciju o zaposlenim i nezaposlenim licima na općini Gračanica u periodu 01.01. do 20.06.2014.godine, ja ću se samo kratko osvrnuti na podatke iz te informacije.

Broj zaposlenih u junu 2014.godine na općini Gračanica je 8.388 osoba, što je za 166 lica ili 98,06% manje u odnosu na broj zaposlenih u decembru 2013.godine.

Broj evidentiranih nezaposlenih na našoj općini u junu 2014.godine je 9.395 lica, što je za 263 lica ili 98,28 % manje u odnosu na stanje nezaposlenosti na dan 31.12.2013.godine.

U ukupnom broju nezaposlenih osoba je 4.705 žena. Od ukupnog broja nezaposlenih najviše je KV radnika, zatim nekvalifikovanih radnika, radnika sa SSS itd.

Posmatrano po zanimanjima kod nezaposlenih sa VSS na evidenciji Biroa dana 28.10.2014.godine evidentirano je 95 ekonomista, 54 pravnika, 23 profesora razredne nastave, 21 profesor engleskog jezika, 19 socijalnih radnika, 18 profesora bosanskog jezika, 16 pedagoga itd.

Kod nezaposlenih sa SSS najviše je evidentirano 387 ekonomskih tehničara, zatim 355 maturanata gimnazije, 225 medicinskih sestara, 214 mašinskih tehničara, 125 elektroenergetskih tehničara itd.

Najveći broj evidentiranih nezaposlenih KV radnika je 763 prodavača, zatim 500 konfekcijskih radnika, 301 bravar, 285 vozača, 268 frizera, 229 automehaničara, 179 kuhara, 177 zavarivača, 170 stolara itd.

U periodu januar-juni 2014.godine poslodavci su potpisali 65 ugovora o obavljanju volonterskog odnosno pripravničkog rada sa nezaposlenim osobama, a u periodu januar-oktobar potpisano je 108 ugovora.

Za prvih šest mjeseci 2014.godine zabilježen je veći broj lica koji su zasnovali radni odnos od lica koja su se prijavila na evidenciju Biroa zbog prestanka radnog odnosa za 337 osoba, što je pozitivan trend.

Posmatrano na nivou Tuzlanskog kantona Općina Gračanica je na drugom mjestu po zaposlenosti poslije Tuzle, a po broju nezaposlenih je na trećem mjestu poslije Tuzle i Lukavca.

Registrovana zaposlenost kao i nezaposlenost na Općini Gračanica 30.06.2014.godine manja je u odnosu na stanje 31.12.2013.godine.

Upoznat ću vas i sa realizacijom Javnih poziva za učešće u sufinansiranju zapošljavanja po Projektima Federalnog i Kantonalnog zavoda za zapošljavanje. Početkom maja ove godine objavljeno je sedam projekata.

Poslodavci sa područja općine Gračanica od maja do oktobra 2014.godine potpisali su ugovore za slijedeće projekte:

1. Projekat „Prvo radno iskustvo“ poslodavci su potpisali 17 ugovora o sufinansiranju i zaposlili 25 nezaposlenih lica, od toga je radni odnos zasnovalo 21 lice sa VSS na 12 mjeseci i 4 lica sa SSS ili KV radnika na 6 mjeseci.

2. Projekat „Prilika za sve“ radni odnos zasnovalo je 141 nezaposleno lice na period od 6 mjeseci, kod 46 poslodavaca.

3. Projekat sufinansiranje zapošljavanja „Teško zapošljivih radnika“ starijih od 40 godina na 6 mjeseci. Četiri poslodavca zaposlila su 4 osobe.

4. Projekat sufinansiranje „Sezonskog zapošljavanja“ u trajanju do tri mjeseca. Dva poslodavca su zaposlila 8 nezaposlenih lica.

5. Projekat „Javni poziv zapošljavanja Roma“ na 24 mjeseca. Jedan poslodavac zaposlio je 3 osobe.

6. Projekat Javni poziv za učešće u programu „Pripreme za rad kroz obuku, u trajanju od 3 mjeseca. Jedan poslodavac angažovao je 25 osoba kroz pripremu za rad, po završetku obuke poslodavac će zaposliti 70% angažovanih lica.

7. Projekat „Zajedno u obnovi“ sufinansiranje je najviše do 3 mjeseca. Dva poslodavca podnijela su zahtjeve za 6 nezaposlenih lica.

Po navedenim projektima poslodavcima iz općine Gračanica odobreno je ukupno 73 zahtjeva, a zaposleno je ukupno 214 nezaposlenih osoba.

Učesnici u diskusiji po ovoj Informaciji su:

Tursunović Esad:

„Evo da i ja dočekam privrednu temu. Ovo što ste me kolega Edine prekinuli vezano baš za zapošljavanje i nezapošljavanje i zašto sam glasao protiv volontera. Zato, sve i jedan volonter koji završi, koji je visoko obrazovan, on sebe vidi u državnoj administraciji. Šteta nam je to ljudi su toliko sami sebe precijenili kad završe školu, a pola njih završi u Travniku i u Brčkom i pametniji je od pola svijeta. I mi ovdje isfinansiramo, damo sto, sto pedeset hiljada i on je sav važan. Koliko imamo privrednika toliko imamo radnika odnosno na Birou. Upućen sam dobro i na to da i kad se pozovu na radni odnos često odbijaju. I ovo je nestvarno stanje zaposlenih i nezaposlenih u Gračanici. Dosta ljudi radi, ali dosta ih radi na crno. Ima ih dosta koji neće da se osiguraju iz ko zna kojih razloga. Jednom prilikom je Fadil Mešić baš pokrenuo to pitanje i na tome treba dosta poraditi, a ne selektivno ići i gaziti privredu. Inspekcija ovdje dođe i ponašaju se kao kauboji. Treba ići ciljano“.

Nihad Krajinović:

„I moja diskusija je slična diskusiji kolege Tursunovića. Ja bih ovako započeo. Juče smo obilježili Dan državnosti Bosne i Hercegovine, ali smo svi bili malo više na ovim društvenim mrežama i tamo sam primjetio zanimljivo da veliki dio koji koristi društvene mreže vole državu na facebook profilu, a u stvarnosti se baš i ne trude da to pokažu. Dosta naših građana zaista radi na crno. Ja bih volio da je ovoj Informaciji omjer nezaposlenih i zaposlenih drugačiji. I da je još više zaposlenih u odnosu na broj nezaposlenih na općini Gračanica i dalje. Ima dosta zaista onih koji su prijavljeni na Biro, a mi svi djelimično i sudjelujemo u tome, jer evo samo mi ovdje u sali, zapitajmo se koliko imamo ličnih tzv. kućnih frizera, kućnih automajstora, kućnih molera, koji nisu prijavljeni u odnosima one koji se teško bore, obrtnika ali i velikih poslodavaca, da stignu zaraditi, namete koje je država postavila i da opet uplate radnicima doprinose i da ih drže. Svakako bih ovdje, volio i da škole koje su na opštini Gračanica, naravno srednje škole, malo možda više sarađuju i sa Biroom i sa poslodavcima. Znači da vratimo onu priču koju smo davno pričali, da vode tu politiku, mislim politiku škola. Pozvao bih i poslodavce da je možda i do njih, evo da sa vlasti i sa Općinskim vijećem, cjelokupno sa društvom, malo više prezentiraju svoje djelatnosti i približavaju onim koji stižu iz osnovnih škola. Kao što Esad reče ne moramo imati sve visoko obrazovane. Čast je biti radnik, pošten radnik. Drago mi je da je direktorica Biroa rekla da stižu informacije iz Federalnog zavoda za zapošljavanje, o raznim javnim pozivima. Volio bih i ne znam na koji način, s obzirom da imam informacija dosta agencija, fondacija, dakle nevladinih organizacija raspisuje pozive za stimulaciju zapošljavanja i samozapošljavanja i pomoći obrtnicima. Ne znam na koji način bi se moglo napraviti da te informacije preko Biroa dolaze od poslodavaca i obrtnika u Gračanici. Možda i tu ima načina da još neku osobu zaposlimo na području naše općine. I svakako bi bez obzira šta ko mislio pozvao na pojačan nadzor inspekcija kad je rad na crno u pitanju. Hvala“.

Pjanić Safet:

„Evo uglavnom je Nihad dosta toga rekao. I ja ću par stvari reći za zaposlene i nezaposlene, i u Gračanici i u državi i u kantonu prekjuche sam slušao informaciju da na u našem kantonu ima oko stohiljada nezaposlenih, odprilike i da je oko 2.000 nezaposlenih ekonomista, 2.000 pravnika, 1.500 profesora engleskog itd. Po ovoj dinamici zapošljavanja treba da prođe 25 godina da bi se ti ljudi zaposlili, pa i do 30 godina. Tako da možda bi trebalo i ovo Vijeće dati inicijativu da se ova zanimanja koja su zaista hiper produktivna malo zaustave a da se sa privredom koja je na izdisaju pokuša nešto napraviti da se tu nađe neki balans jer ovo kako ide zaista ne vodi ni čemu. Ako znamo da je u januaru ove godine bez posla ostalo 36.000 radnika više nego u istom periodu prošle godine a uglavnom se to odnosi na ljude iz privrede. Sve ovo što se borimo, borimo se da zapošljavamo ljude u vanprivredu što zaista ne vodi ničemu. Ja sam skoro bio na jednom pozivu u Brčko distriktu vezano za otvaranje pogona i zapošljavanje ljudi iz tog kraja i kad sam dobio uslove, uvjete poziva, rekli su mi da moram primiti ljude koji imaju 300 mjeseci staža na Birou. Vjerujte i od toga smo odustali jer to je uglavnom fabrika za starce. Ovo što ste i vi rekli malo prije, puka je ovo statistika, jedan zaposlen, jedan nezaposlen, jedan radi, jedan penzioner, ne može nas odvesti nikud i vodi apsolutno u propast i da ovom jednog dana mora doći kraj. Drugo, rekao je gospodin Nihad, crno tržište siva ekonomija. Mi svi znamo da imamo puno firmi gdje, kad su inspekcije, samo radi gazda i jedan šef sale, a ima dvadesetak uposlenih. Takvih je zaista puno na našem kantonu i na našoj opštini. Mislim da se u tom pravcu možda može napraviti malo neki pomak, neki boljitak, ali sve u svemu po pitanju tržišta rada, radna snaga, zapošljavanje u našoj državi postaje bespredmetno. Mora se promijeniti Zakon o obrazovanju, oslušnuti potrebe tržišta i spram tržišta vršiti upis srednjih škola. Ovo je takva situacija da izgleda oni posao neće dobiti nikad“.

TAČKA 5

INFORMACIJA O REALIZACIJI PROJEKTA REGIONALNE DEPONIJE DOBOJ.

Nije bilo učesnika u diskusiji i Informacija o realizaciji projekta Regionalne deponije Doboj je usvojena jednoglasno.

TAČKA 6

RJEŠENJA IMOVINSKO PRAVNE SLUŽBE.

Komisija za propise i statut razmatrala je rješenja imovinsko pravne službe i nije imala primjedbi.

Rješenja imovinsko pravne službe su usvojena jednoglasno.

Sjednica završena u 14,20 sati.

Zapisnik vodila: Mevlida Naimkadić

Tonski snimak sjednice uredno je arhiviran.

ZAPISNIK VODILA:

Mevlida Naimkadić

PREDSJEDAVAJUĆI
OPĆINSKOG VIJEĆA
mr. sc. Edin Ibrišević